

'EMEO XOP YÕG TAPPET

Topak-tok

1 ¹Hõmã hãmyãxatamuk xohix hã Topa te hãm'ãktux pax, tu hãm'ãktux punethok Yoneo xop yõg mõnãyxop pu', ha tik xop te Topa pupi hãm'ãktux, nõy mõnãyxop pu' xuktux, ²pa Topak-tok te yãy Tak pupi hãm'ãktux nõmhã, tu yũmũ'ã' xuktux. Nõ'õm te Topa yũmũg Tak mütik hãm xexka xop xohix mĩy, ha Topa tek-tok yãykutnãhã', pu hãm xexka yõg hãpxop xohix pop, xix pekkox yõg hãpxop xohix pop kamah, ³yãk-tok max, tu Topa max xe'ëgnãg putuk, tu yã Topa xe'ëgnãg kamah. 'Ûyĩy'ax ka'ok, hu hãm xexka xop xohix xat, xix pekkox xop xohix xat, pu tu pip ka'ok, ha mãyõn xop mãm ka'ok, xix kõnãg xexka xup ka'ok kamah, ha tikmũ'ũn kuxa kummuk tupmãhã', tu' tupmã kux, 'ĩhã pekkox ha' mõg, tu Topa xexka xe'ëgnãg yĩm xe'e hã' yũm.

Topak-tok xix pekkox yõg nũ'pok xop

⁴Pekkox yõg nũ'pok xop xexkak-tõgnãg, ha Topak-tok xexka xe'ëgnãg, yĩy Topa te nũ'pok xop 'ãxet'ax ka'ok mĩy, tuk-tok 'ãxet'ax mĩy max xe'ëgnãg. ⁵'Ap ta nũ'pok xop pu hãm'ãktux'ah, nõy yã nõm xop yãy kutok 'ãktux hok, pa yãy kutok pu hãm'ãktux, hu:

“'Ãmũn yã 'ũgkutok.

Hõnhã 'ãte 'ãmũn yãk kutok 'ãktux,” Kaxĩy.

Tu xe hãm'ãktux, hu:

“'Ûgmũn yã 'õg 'Ãtak.

Yã 'ãmũn yãk kutok,” kaxĩy.

Tuk-tok pu' xuktux. ⁶Tuk-tok puxet nũ'kutnãhã hãhãm tu', ha' xip ta tu', ha:

“Pũyã pekkox yõg nũ'pok xop xohix kuxa' yẽy 'ãkeppah,

nũy tu nũktettex,” kaxĩy.

⁷Pa nũ'pok xop 'ãktux, hu:

“Pũyã tu hãm mõ'ka'ok, kuxap putuk,

pũyã nõm kãmãnat xop yã ka'ok,

tu 'ãmuuh putuk kamah,” kaxĩy.

⁸Tu yãy kutok pu hãm'ãktux, hu:

“Topah, xate' xat mõ kuma 'ãmõg, tu' xat kux 'ohnãg,

tu 'ōg tikmũ'ūn xat max, nũy tu hãmyok mĩy.

⁹Xate hãmyok mĩy'ax putup pax, xix hãpkohe mĩy'ax putup nōg, yĩy 'ōgnũ Topa te xa yãykutnãhã', xa tikmũ'ūn hã 'ãxexka', nũy 'ãkuxa hittup xexka', ha 'ãxapek-tōgnãg xop," kaxĩy.

¹⁰Tu xe yãy kutok pu hãm'ãktux, hu:

"Hõmã 'ãmũn te mãxap, tu hãm xexka xohix mĩy, yãy yĩm hã pekkox mĩy, tu hãpxop xohix mĩy.

¹¹Ha pekkox te yãy xaxogãp-tup, tu' nōg, xix hãhãm te yãyxaxogãp-tup, tu' nōg, pa ta tu 'ãxip ka'ok, ha hãmyãxatamuk xohix punethok nōg, puxix pekkox xix hãhãm kutut, tu' nōg putup, tu topixxax kutut putuk nōg,

¹²ha tikmũ'ūn te topixxax kutut xut, nũy nō tup hã' yãnãn, nũy tu mō'tat, ha kaxĩy xate pekkox xut putup, xix hãm xut putup, nũy nō nōy yãnãn tup mĩy, pa 'ãxip ka'ok, tu kutut 'ohnãg," kaxĩy.

¹³Ha Topa te pekkox yōg nũ'pok xop xãnã 'ohnãg, pu yũhũm, pa yãy kutok xãnãhã', hu:

"Yũhũm 'ũgyĩp xe'e hã, 'ãte nōm kummuk xop nōã', yĩy hip, 'ãte nōm kummuk xop nōã', tu nōm xop xa tu' gãy xop nōã', tu' kummugãp-tup 'ũyãnãn tu', ha ta xate' hip, puyĩ' xohix yĩpkox pi' 'ãxat'ax tu'," kaxĩy.

¹⁴Tep te xĩy pekkox yōg nũ'pok xop? Yã' koxuk xe'e xop, tu Topa pu hãpxopmãhã', ha nũ'pok, nũy yãy yōg tikmũ'ūn mō'nĩynãm, puyĩ' mōg, hu mōxakux pekkox tu'.

Topa te tikmũ'ūn kuxa kummuk xit

2 ¹'Apu yũmũg yĩpkox pip, hãm'ãpak max'ax pu yũmũg yĩpkox pip, 'ũyĩy hãpxopmã kummuk hok. ²Pekcox yōg nũ'pok xop te hãm'ãktux, tu hãpxe'e 'ãktux, ha Topa te' yĩpkox hok xop pu hãpkummugãhã', ³Tu yũmũg kuxa kummuk xit'ax, tu yũmũ'ã hãmmax xe'ëgnãg nã'ax, pa yũmũg yĩpkox hok, puxix Topa yũmũ'ã hãpkummugã xexka', yũmũ'ãte Yeyox yōg hãm'ãktux putup nōg hah. Ha' xuktux hãmãxap, ha hãm'ãpak xop te' yĩkopit, tu hãpxe'e 'ãktux, ⁴ha Topa te hãpxe'e 'ãktux kamah, hu hãpxopmã ka'ok xe'ëgnãg, yã hãpxopmã xe'ëgnãg punethok, pu tikmũ'ūn pãnã, nũy kuxa' yëy, yã tikmũ'ūn te nōm mĩy hok. Ha Topa Koxuk tep-tup pax, hu tikmũ'ūn ka'ogãhã', pu hãpxopmã ka'ok.

Yeyox Kunnix te' kuxa kummuk xit

⁵Ha Topa te pekkox yōg nũ'pok xop yĩmōgatux 'ohnãg, pu pekkox tu 'ũyōg tikmũ'ūn xat. 'Ãmhok. Pãyã yãy kutok Yeyox yãykutnãhã pu tu xat.

⁶Ha Topa yōg tappet te:

“Tikmũ'ün yâk-tôgnâg, pâyâ Topa te nôm hâmp'e'paxex, nũy 'ũxutigâ'.

7 Ha hõnhâ tikmũ'ün kutôgnâg, ha pexkox yôg nũ'pok xop xexka', pa Topa te tikmũ'ün xexkânâhâ', pu tu xat,

8 Tu' ka'ogâhâ', pu tu hep xop xohix xat,” kaxiy.

Hamũn. Tappet te' hep xop xohix xat'ax 'âktux, 'a yũmũ'âte' pênâ'ah nômhâ, 'ap tikmũ'ün te' hep xop xohix xat pênâ'ah. 9Pâyâ yũmũg kuxa te Yeyox pênâhâ', yâ hâpxip kutôgnâg 'ihâk-tôgnâg, Topa tep-tup hak-tôgnâg, ha nũ'pok xop xexka', pa Yeyox xok, tu' hep xop xohix pupi' xok, pu Topa yũmũ'â hâmmâxnâ', hu' xexkânâ xe'êgnâg nômhâ, 'ũxok hah xexkânâhâ'. 10Topa te hâpxop xohix mĩy, 'ũp-tup tu' mĩy, tuk-tok xop putup, puyiy tu max xe'êgnâg, nũy Topa putuk tu max xe'êgnâg. Yiy Yeyox xũy, pu Topa' xũy'ax hâ Yeyox yôg hâpxopmâ'ax kuxyâ'. Yâ Yeyox te Topa yôg putat hâ yũmũg mógâhâ'.

11 Tu tikmũ'ün kuxa kummuk tupmâhâ', ha nôm xop te Topa hâ' Tak, yâ Topa te' kuxa mãm ka'ok xop hâ 'Átak, yiy Yeyox yâ xape xop 'âktux, 'ap xape tu yâyhâhup'ah. 12 Yiy tappet te Yeyox yôg hãm'âktux'ax 'âktux, hu:

“Topah, 'âtek xape xop pu 'ãmũn 'âktux putup,
tu 'ôg hâpxopmâ'ax ka'ok 'âktux putup,
tu xa kutex putup, nũy Topa hãm'âktux max,
puyiy tikmũ'ün xohix yâykotinnânâ' pip,” kaxiy.

13 Ha tappet te xe:

“Topah, 'ũgkuxa yũm ka'ok 'ãmũn kopah,” kaxiy.

Tu xe:

“Nũntek xip, 'ũgkutok xop tek mütik pip,
Topa te 'ũgkutok popmâhâ',” kaxiy.

14 Yeyox tek-tok 'âktux, ha tikmũ'ün xe'e', 'ap koxuk'ah, yâ' yĩn pip, xi' yĩn hep 'âta', yiy Yeyox te yũmũ'â hâ tikmũ'ün kutok, nũy tu xok, nũy Hãmgâyâgnâg nõâ', nôm tep-tex. 15 Ha tikmũ'ün kuxânôg, tu' xok'ax yĩpkutuk, 'üyôg hãmãyaxatamuk xohix hâ' yĩpkutuk, ha Yeyox te nôm xop kuxa mãmãmâhâ, nũy nõ kuxânôg kuxyâ', pu tu hittup. 16 Yeyox nũn. Tep ha' nũn? 'Ok nũn, nũy pexkox yôg nũ'pok xop mõ'nĩynâm? 'Ãmhok. Yâ Topa yôg tappet te: 'Ûnũn, nũy mõnãyxop hittap 'Amanãm mókputox hâ tu tehet,” kaxiy. 17 Hamũn. Yiy Yeyox yâyhâ tikmũ'ün kutok, nũy tu xape xop putuk, nũy xape hâ 'ãmânex xexka xe'êgnâg. 'Ûmax, tu tikmũ'ün kuxa ka', tu Topa tu hâpxopmâhâ', tu tuknôg 'ohnâg, nũy tikmũ'ün yôg hâpkummuk mĩy'ax xaxogâ', pu tu kux. 18 Yâ Yeyox xũy, tu yâ putup'ax mĩy 'ohnâg, hu hõnhâ tikmũ'ün hâ tu' tehet, tu' ka'ogâhâ', puyiy tu yâ putup'ax mĩy hok kamah, nũy hâpxopmâ kummuk hok.

Yeyox xix Mõyyex

3 1 'Ãkuxa mãm ka'ok Yeyox kopah, huk mũn hâ 'ãxape xop, ha Topa te 'ãxânâhâ kamah. 'Ãpu Yeyox 'ũm pe'ãpaxeh, yâ Topa te nũ'kutnâhâ', pu 'ãmânex xat'ax yôg hãm'ax hâ tu' hãm, ha yũmũg kuxa mãm ka'ok nõ 'ãmânex xat'ax kopah. 2 Topa te Yeyox yâykutnâhâ', pu tu hâpxopmâ', ha

kaxīy mōnāyxop hittap Mōyyex te hāpxopmā max, yāy xape xop xohix kopa hāpxopmā max, tu' tuknōg 'ohnāg. ³Tikmū'ūn te mīptut max pe'paxex kutōgnāg, pa tikmū'ūn te mīptut mīy, ha nōm tu pe'paxex xexka'. Kaxīy mōnāyxop hittap Mōyyex yā xexka 'Iyaet yōg tikmū'ūn kopah, ha Yoneo xop te nōm 'āktux max, pāyā Yeyox mūn xexka xe'ēgnāg, tu Topa yōg tikmū'ūn xohix hā' xuxyā', yā Topak-tok xe'e!. ⁴Kaxīy mīptut 'ūm te yāy 'ūm mīy 'ohnāg, ha Topa te hāpxop xohix mīy. Hōmā Topa te 'Iyaet yōg mōnāyxop xānāhā', puyīy yāy hā tikmū'ūn. ⁵Mōyyex hām Topa pu', 'ūyōg kāmānat tu', tu yāy xape xop kopa' hām, tu tuknōg 'ohnāg, tu Topa pupi tikmū'ūn pu hām'āktux, tu: “Topa te hām'āktux putup,” kaxīy. ⁶Pa Kunnix te hāpxopmā xexka', tu' tuknōg 'ohnāg, yāy Tak pu' hām tu', tu yāy xape xop pēnā max, ha Kunnix hā yūmūg xape, 'īhā yūmūg kuxānōg hok, 'īhā yūmūg kuxa mām ka'ok, tu hāmmax hip.

⁷Yīy Topa Koxuk te:

“Hōnhā 'āxop te Topa yīy'ax 'āpak,

⁸ 'Āpu, 'īpkox pi', ka 'ōg mōnāyxop yōg hāpxopmā'ax mō'tat, ha mōnāyxop yīpkox 'ohnāg, tu Topa gāyāhā', 'īhā hām panip xexka tu' pip,” kaxīy.

⁹Tu xe:

“Ōnte 'ōg mōnāyxop tek yīkopit, tuk gāyāhā', pāyā yōgnū hāpxopmā'ax xe'ēgnāg pēnā tap, hāmyāxatamuk xohix te 40 hā' pēnāhā',

¹⁰ Yīk gāy nām nōm tikmū'ūn tu', tu:

‘Yā' kummuk pax, tu hāmpe'paxex kummuk, tu yōgnū putat xak punethok, hāpkummuk mīy hu,'

¹¹ huk gāy, tu yāy 'āxet'ax hā hām'āktux xex, hu:

‘Nōm xop tek xip'ax hā mō'āxakux hok, nūy 'ūgmūtik tu hāpxopmā kux hok,' kaxīy.”

¹²Ūkxape xop, 'ōg pa 'āti', ka Topa yōg putat xak, 'ākuxa kummuk tu' xak, xix 'ākuxa mām hok tu' xak, ka Topa xe'ēgnāg nīm. ¹³Āpu hōnhā mō 'ānōy mō'nīynām, 'āmnīy xohix hā mō'nīynām, 'īhā Topa te tikmū'ūn xānāhā', puyīy Topa pu' yīpkox pi'. Yā hōmā Topa yōg tappet te hōnhā 'āktux, tu: “Hōnhā Topa te hām'āktux,” kaxīy. 'Āpu, 'āxop yāy nōy ka'ogā', ka 'āyīpkox mo' yāy yīnnīn, yāy pu' koit tu', xayīy hāpxopmā kummuk hok. ¹⁴Hōmā yūmūg kuxa mām ka'ok Kunnix kopah, yā yūmūg kuxa mām ka'ok mō kumak mōg, kopxix Kunnix hā yūmūg xape'.

¹⁵Yīy Topa yōg tappet te:

“Hōnhā 'āxop te Topa yīy'ax 'āpax, 'āpu 'āyīpkox pi', ka mōnāyxop yōg hāpxopmā'ax tat, ha mōnāyxop yīpkox 'ohnāg, tu Topa mūtik yāytuk-mīy,” kaxīy.

¹⁶Ū 'ūm te Topa yōg hām'āktux'ax 'āpak, tu nū mūtik yāy tuk-mīy? Yā mōnāyxop te Mōyyex pe' mōg, tu hām'āpak, tu yāytuk-mīy, ha Mōyyex te

nõm mõy tap hāpxexka 'Eyt kopah. ¹⁷Ü'üm tu Topa gāy hāmyāxatamuk xohix te 40 hā ta tu' gāy? Yā tikmū'ün te hāpxopmā kummuk, hu' xakix hām panip xexka tu'. ¹⁸Ü'üm te Topa yōg hām'āktux'ax 'āpak, 'ihā' yāy 'āxet'ax hā hām'āktux xex, hu: “'Ōm xop 'ükxip'ax hā mōxakux hok, nūy 'üg mütik tu hāpxopmā kux hok,” kaxiy? Yā tikmū'ün te hām'āktux'ax 'āpak, tu Topa mütik yāytuk-miy. ¹⁹Yiy yūmū'āte hāmyūmmūg, yā' mōxa 'ohnäg, nūy Topa yōg xip'ax hā mōxakux, 'ükuxa mām 'ohnäg tu' mōxa 'ohnäg.

4 ¹Hōmā Topa te yūmū'ā hām'āktux xex, tu hām'āpak max'ax 'āktux, hu: “'Ükxip'ax hā mō'āxakux'ax, nūy 'ügmütik 'āpi!” kaxiy. 'Āpu, yūmūg pa 'āti', nūy Topa yōg xip'ax hā mōxakux xe'e!. ²Tikmū'ün hittap te' xupak, ha yūmū'āte' xupak kamah, tu hām'āpak max'ax 'āpak, kamah, pa tikmū'ün hittap kuxa 'üm mām 'ohnäg Topa kopah, yiy Topa te nõm pu hāmmaxnā 'ohnäg, 'ükuxa mām 'ohnäg hah, ³ha yūmūg kuxa mām ka'ok, tu Topa xip'ax hā mō yūmū xakux, nūy Topa mütik hāpxopmā kux, ha:

“'Üggāy, hu yāy 'āxet'ax hā hām'āktux xex, hu:

'Nõm xop tek xip'ax hā mōxakux hok,
nūy 'ügmütik tu hāpxopmā kux hok.' Kaxiy.”

Topa te' xuktux tap, 'ihā tu hām xexka xohix miy tu hāpxopmā kux. ⁴Yā Topa yōg tappet te hāptup te 7 'āktux, yā hāptup xe'e!, hu: “Topa te hāpxopmā kux, tu hāptup te 7 'ihā hāpxopmā 'ohnäg, hāpxopmā kux tu!” kaxiy. ⁵Tu xe: “Nõm xop te Topa xip'ax hā mōxakux hok, nūy nū mütik tu hāpxopmā kux hok,” kaxiy.

⁶Tikmū'ün hittap te hām'āpak'ax max 'āpak hāmāxap, tu Topa xip'ax hā mōxakux hok, nūy nõm mütik tu hāpxopmā kux hok, 'ükuxa mām 'ohnäg tu', pāyā' nōy xop mōxap-tup, nūy Topa mütik tu hāpxopmā kux. ⁷Hāmyāxatamuk xohix nõg 'ihā Topa Koxuk te xe hām'āktux, ha mōnāyxop Namix te Topa pupi hām'āktux, yiy:

“Hōnhā 'āxop te Topa yiy'ax 'āpak.

'Āpu, 'ipkox pi!” kaxiy.

⁸Pax pu mōnāyxop hittap Yoyoe te tikmū'ün mōgā, pu Topa xip'ax hā mōxakux, nūy tu hāpxopmā kux, puxix Topa xe' xuktux hok mōnāyxop Namix pu!. Pāyā mōnāyxop mōxa 'ohnäg, 'üyipkox 'ohnäg tu', yiy Topa te' xuktux 'üxeheh. ⁹Pa hāptup xe'e mō'nāhā Topa yōg tikmū'ün pu!, nõm xop kuxa mām ka'ok xop pu mō'nāhā, tu Topa yōg hāptup te 7 putuk, 'ihā Topa te hāpxopmā kux. ¹⁰Tikmū'ün te Topa xip'ax hā mōxakux, nūy nõm mütik tu hāpxopmā kux, puxix hāpxopmā'ax xohix tu kux, tu xe hāpxopmā 'ohnäg, Topa te hāpxopmā kux putuk. ¹¹'Āpu yūmū'ā Topa xip'ax hā mōxakux kamah, nūy Topa mütik yūmūg hāpxopmā kux. 'Āpu yūmūg yipkox pip Topa pu!, ku'u yūmūg tikmū'ün kummuk putuk, tu yūmū'āte mōxakux 'ohnäg.

¹²Yā Topa yōg hām'āktux xip ka'ok. Tikmū'ün mīkax xexka 'üxox tix hā' xuhmīy, tu' xuhmīy nūy 'üyīn xit, nūy tu' kup mūggā!. Ha kaxiy Topa yōg hām'āktux ka'ok, tu yūmū'ā yāy kuxa yūmmūgāhā!. Yūmū'āte mō'kupix, xix hām'āpax, puxix nõm hām'āktux yāy pekpaxex'ax yūmmūgā!, tu yāy pekpaxex xohix yūmmūgāhā' xix yāy putup'ax yūmmūgāhā!, 'üyiy yāy kuxa yūmmūg,

13 yīy tikmū'ūn te hāpxopmā'ax xaptop hok Topa pu'. Yā Topa te hāpxopmā'ax xohix pēnāhā', tu hāmyūmmūg, tu tikmū'ūn yōg hāmpē'paxex xohix yūmmūg, ha Topa pu yūmūg xohix te yāy yōg hāpxopmā'ax 'āktux putup.

Yeyox te 'āmānex xop xohix xat'ax

14 'Āpu yūmūg kuxa mām ka'ok, yā hōmā yūmū'āte hām'āktux, tu yūmūg kuxa mām ka'ok Yeyox kopa 'āktux. Yūmū yōg 'āmānex xat'ax xe'ēgnāg te Topa ha' mōg, tu' keppa' xip, yā' xuxet'ax Topak-tok Yeyox. 15 Tu yūmūg kuxa ka', yūmūg pu'uk ha yūmūg kuxa ka', ha' kummuk xop te yūmū'ā' kummugāhā', 'ūyiy hāpkummuk mīy, tu Yeyox kummugāhā kamah, puyiy hāpkummuk mīy, pāyā hāpkummuk mīy 'ohnāg. 16 'Āpu yūmūg mōg, yūmūg kuxānōg hok. Yā Topa ha yūmūg mōg, nūy nōm pu hām'āktux, ha Topa te yūmū'ā hāmaxnāhā', xix yūmūg kuxa ka', xix mō yūmūg nīynām.

5 1 Topa te 'āmānex xat'ax yāy kutnāhā', tu tikmū'ūn kopa' yāy kutnāhā', pu tikmū'ūn pupi hām'āktux Topa pu', ha Topa te 'āmānex xohix yīmōgatux, pu xokxop mō'hap, xix hāpxop, nūy Topa pu haxyā', puyiy Topa tikmū'ūn yōg hāpkummuk mīy'ax xaxogā', pu tu kux. 2 Ha 'āmānex xat'ax yā pu'uk kamah, nūy hāmyūmmūg hok xop hā' tot, nūy hāpkummuk mīy'ax xop kuxa ka'. 3 'Ūpu'uk, hu yāy mūn pu hāpxop mō'hap hāmāxap, nūy Topa pu' haxyā', puyiy hāpkummuk mīy'ax xaxogā', pu tu kux, hak-nāy tu 'āmānex te tikmū'ūn pu mō'hap kamah, puyiy Topa' yōg hāpkummuk mīy'ax xaxogā kamah. 4 Tikmū'ūn te' xak 'ohnāg pu Topa yāy kutnā', puyiy tu 'āmānex xat'ax. 'Āmhok. Topap-xehnāg te yāy kutnāhā', tu mōnāyxop 'Anām yāy kutnā hāmāxap.

5 Ha kaxiy Kunnix te' xak 'ohnāg, pu Topa' yāy kutnā', puyiy yāyhā 'āmānex xat'ax. 'Āmhok. Pa Topa te:

“Āmūn yāk kutok!

Hōnhā 'āte xa hā 'ūgkutok 'āktux,” kaxiy.

6 Ha Topa yōg tappet te xe hām'āktux, hu:

“Tik hittap Mēkiyenek yā 'āmānex mō kuma' mōg,
hā kaxiy 'āmūn yā 'āmānex mō kuma mōg kamah,
tu' kux 'ohnāg,” kaxiy.

7 Yeyox xip hām tu', 'ihā Topa pu hām'āktux, tu ta tu' xak, tu' yiy ka'ok, tu' potaha', pu Topa' tux hok pu tikmū'ūn putex hok, ha Topa te' xupak. Yā yāy kutōgnāg pe'paxex hah. 8-9 'Ūk-tok, pāyā' xūy, nūy tu yīpkox pip yūmmūg, tu hāmyūmmūg max, hu tikmū'ūn kuxa kummuk xit'ax, tu tikmū'ūn yīpkox pip xop kuxa kummuk xit'ax, nūy tu mō kuxa max tat 'ūyānān tu'. 10 Yā Topa te yāy kutok yāy kutnāhā', puk-tok yāyhā' xat'ax, tuk-tok pu hām'āktux, hu:

“Āmūn yā 'āmānex xat'ax, tu tik hittap Mēkiyenek putuk,” kaxiy.

'Ōg pa mōxip, xayiy kuxa yūm kux

11 Yā 'ūgmū'āte 'āmānex 'āktux pu' max, nūy xa Yeyox 'āktux, yā yūmū yōg 'āmānex xat'ax, ha xa hām'āktux punethok, nūy xa hāmyūmmūgā', pāyā 'āp-tox

ka'ok. ¹²Häpxip punethok hä 'äxop te Topa yög häm'äktux'ax 'äpak, päyã 'äxop te häpxaxok, hu 'änöy pu hämyümmügã hok. Kakxop te hämyümmüg 'ohnãg, tu' yöktat puxehnãg xak, hu' xo'op, 'ap te xogyin mã'ah. Hã kaxiy 'äxop te häm'äpak kutögnãg, tu hämyümmüg 'ohnãg, kakxop putuk, 'ap häm'äktux ka'ok 'äpak'ah, 'äp-tox tuknög tu'. ¹³Kakxop pu'ügnãg te' yöktat hep xo'op, tu hämyümmüg 'ohnãg, 'ok pe hämyok, 'ok pe häpkohe!. Hã kaxiy 'äxop te häm'äktux te mãxap yümmüg, päyã häm'äktux ka'ok yümmüg 'ohnãg, hu häpxopmã'ax kopit kummuk. ¹⁴Yã' xiptap xop te xogyin mãhã, tu hämyümmüg, tu häm'äktux ka'ok pe'paxex, nüy tu hämmax yümmüg, nüy tu häpkummuk yümmüg, puyiy häpxopmã max.

6 ¹Äpu yümü hämpe'paxex max, nüy hämyümmüg, nüy 'üxiptap xop putuk yümü'äte hämyümmüg, nüy hämyümmüg'ax te mãxap yümmüg max. Yã nõm hämyümmüg'ax te: Topa te tikmü'ün kuxa kummuk xit, häpxopmã'ax hok hä' xit, nüy kuxa max mö'tat 'üyänän tu'. Tikmü'ün kuxa yüm ka'ok Yeyox kopah, puxix Topa' hok hä' kuxa xit. Kaxiy. Yã hämyümmüg'ax te mãxap 'öhöm, ha yümü'äte hämyümmüg. ²Ha kama hämyümmüg'ax te mãxap, pu' kuxa mãm ka'ok xop 'ünöy putox pix, 'ükuxa yüm ka'ok hah, ha' nöy putox yümü' yim xix, puyiy Topa Koxuk ka'ogã', 'äxop te hämyümmüg kamah. Yã kama hämyümmüg te mãxap, hu: Topa te' xakix xop putpu' hinnãp-tup, ha häptup xe'e mö'nãp-tup, 'ihã Topa te' hep xop xohix yög häpxopmã'ax kopit, tu' kummugãp-tup 'üyänän tu', tu häpxaxok 'ohnãg. Yã hämyümmüg te mãxap 'öhöm. ³Äpu yümü'äte häm'äktux kuxyã', 'üyiy häm'äktux nöy 'üm 'äktux, puyiy Topa yümü'ã häm'äktux ka'ok yümmügã'.

⁴Topa yög putat xak hok. 'Äxop te putat xak, nüy häpxopmã kummuk, ta putpu 'änün hok. Tikmü'ün te Topa yög putat hä' mög tap, tu pexkox yög häpxop paha!, Topa Koxuk te nõm ka'ogãhã', ⁵ha Topa yög häm'äktux max xex 'ükuxa kopah, tu pexkox ka'ok'ax yümmüg, ⁶tu Topa yög putat xak, nüy putpu tu nün hok, puxix Topa xe' hupmã hok, puyiy yã yög häpxopmã'ax kummuk kux. 'Ämhok. Yã' nöy te Topak-tok 'äktux kummuk, tu Yeyox mün pu häpkummugãhã'. Tu tep putep putuk? Tu' kummuk xop putuk, nõm xop te Yeyox putex, ha' kummuk xop putuk, hu ta Topa yög putat xak. Yã Yeyox pu' hupmã xexka'.

⁷Hãm max te tex punethok pop, ha häpxop punethok xokax, tu' tuk, ha häpxa xuxyã hittup, ha Topa te nõm pu hämmaxnãhã'. ⁸Ha hãm nöy te mĩmyãm punethok pip, xix mĩxux kummuk pip, yiy Topa te nõm pu häpkummugãhã', ha tikmü'ün te' göy hax nãm. Tikmü'ün te Topa yög putat xak, tu häpxa kummuk putuk, häpxopmã kummuk tu'.

⁹'Ükxape xop: 'Äte häm'äktux hã xa hämyümmügãhã', tu häpxa 'äktux, nüy xa tikmü'ün kuxa 'äktux. Yã Topa te xa hämmaxnãhã', 'a 'äxop te häpxa kummuk putuk'ah, nõm Topa tep-tup nög. 'Ämhok. Päyã 'äxop te häpxa max putuk, yã 'ãmög kuma mög Topa yög putat hä. ¹⁰Topa te hämyok mĩy, tu 'ög häpxopmã'ax xaxok 'ohnãg, ha 'äxop te Topap-tup pax, yiy 'äxape hã tu tehet, nüy nõm xop mö'nĩynãm. ¹¹'Ügmü'äte 'äp-tup, xa 'ähittup hã Topa yög putat hä 'ãmög, nüy tu mö kuma mög, nüy pexkox

yõg hãpxop hip, nũy pop. ¹² 'Ăkuxa tuknõg hok, pa 'ăkuxa mãm ka'ok, nõm xop putuk, nõm xop te Topa yõg putat hã' mõg tap, xayĩy pexkox yõg hãpxop pop kamah. Yã Topa te xa hãm'ăktux xex kamah, nõm xop putuk.

Topa te hãm'ăktux xex

¹³ Hõmã Topa te hãm'ăktux xex mõnãyxop 'Amanãm pu', tu yã' hitop xex hok, tu' xexka xe'ėgnãg, ha' xohik-tõgnãg, yĩy yã 'ăxet'ax hã hãm'ăktux, nũy hãm'ăktux xex, ¹⁴ hu 'Amanãm pu hãm'ăktux, hu: " 'Ăte xa hãm'ăktux xe'e', yã 'ăte xa hãmmãxnãp-tup, xate yãy kutok pit put putup, pu 'ãmõkputox xohix punethok," kaxĩy. ¹⁵ Yĩy 'Amanãm te' hip, tu mõktu yãy kutok put, tu yãy mõkputox pẽnãhã'. ¹⁶ Tikmũ'ũn 'ũm te' nõy pu hãm'ăktux xex, hu: Hãptup, koxix nũ', nũy xa pago. Topa te hãm'yũmmũg. 'Ăte' koit'ah." Kaxĩy. Tu Topa 'ăxet'ax 'ăktux 'ĩhã ta tu hãm'ăktux xex, puyĩ' nõy kuxa yũm ka'ok hãm'ăktux'ax kopah, nũy nõy kuxa' yẽ. ¹⁷ Topa te hãm'ăktux xe'e', pu tikmũ'ũn yĩkopit hok, hu yãy 'ăxet'ax 'ăktux, 'ĩhã yãy yõg tikmũ'ũn pu hãm'ăktux xex, nõm xop te hãpxop pop'ax pu hãm'ăktux xex. ¹⁸ Topa 'ap te koit'ah, tu hãm'ăktux xex, xix hãpxopmãhã', tu yãy 'ăxet'ax hã hãpxopmãhã', tup te koit 'ohnãg, pu yũmũg kuxa mãm ka'ok, nũy tu hip, pu Topa yũmũ'ã hãmmãxnã', 'ũ yũmũg kuxa hittup. ¹⁹ Hu yũmũg kuxa mãm ka'ok, tu yãy pu yĩkopit 'ohnãg, pãyã yũmũ'ăte' hip, 'ũyĩy Topa keppa yũmũg pi'. Mĩpkox te kõnãg yĩmũ' mõg, ha pipkup putux xexka te mĩpkox tu' hĩy, tu kõnãg kopa' yũm, puyĩy mĩpkox mõg hok kõnãg yĩmũ', ha kaxĩy yũmũg kuxa mãm ka'ok, tu Yeyox puxehnãg kopa' mãm ka'ok. Kamah 'ãmãnex xexka te Topa xip'ax xe'ėgnãg hã mõ'nãhã', tu topixxax max mõ'yinnĩn'ax hã mõ'nãhã', nũy Topa keppa' xihip. Ha yũmũ'ăte' hip kamah, nũy pexkox yõg xip'ax tu 'ãmõxaha', nũy mõxakux, nũy Topa keppa yũmũg pi'. ²⁰ Yeyox te pexkox tu' xupep hãmãxap, tu mõ'nãhã', nũy yũmũ'ã hãmmãxnã', yã 'ãmãnex xop xat'ax xe'ėgnãg mõ kuma' mõg, tu tik hittap Mẽkiyenek putuk.

7 ¹ Nõm tik Mẽkiyenek te kõmẽn Xanẽm yõg tikmũ'ũn xohix xat, tu Topa xe'ėgnãg hã 'ãmãnex, ha 'Amanãm te' gãy xop mũtik yãykix, tu' xexka xop kix, tu yãykix kux, tu ta' mõg, yãy pet ha putpu' mõg, ha ta Mẽkiyenek te' pẽnãhã', tu: "Pũyã Topa xa hãmmãxnã'," kaxĩy. ² Ha 'Amanãm te' popmãhã hãpxop, 'ũyõg hãpxop yãg te 10, tu 'ãmãnex pu' yãg puxet hõm, ha 'Amanãm te nõm hãpxop mõy tap 'ũgãy xop tu'. Yã Mẽkiyenek 'ăxet'ax nõy mĩy, tu: Hãm̃yok xat'ax, kaxĩy. Ha kõmẽn Xanẽm 'ăxet'ax mĩy, hu: 'Ūkuxa yũm'ax, kaxĩy. Yĩy 'ãmãnex 'ăxet'ax nõy te: Tik te tikmũ'ũn xat'ax, tu tikmũ'ũn kuxa mãm̃mã'ax, kaxĩy. ³ Ha tikmũ'ũn te 'ãmãnex yãy tak yũmmũg'ah, xi' tut yũmmũg'ah, xi' yõg mõnãyxop yũmmũg'ah, xix hãm 'ũm hã 'ũtut te' put'ax 'ũm yũmmũg'ah, xix 'ãm̃nĩy 'ĩhã' xok yũmmũg'ah, yã Topak-tok putuk, tu yã hãm̃yãxatamuk xohix hã 'ãmãnex, ha' kuxa 'ohnãg.

⁴ 'Ūyũmmũg. Mẽkiyenek yã' xat'ax, yĩy mõnãyxop hittap 'Amanãm te' hõm hãpxop yãg puxet, ha' gãyxop tu nõm hãpxop mõy tap. ⁵ Mõyyex te' xat, pu Nemi mõkputox te tikmũ'ũn tu' yãg puxet pa', 'ũnõy yãg te 10 yã tikmũ'ũn yõg, ha Nemi yõg xop te yãy yõg tikmũ'ũn tu' paha', yã kama 'Amanãm

hã' mőkputox. ⁶Pa Mëkiyenek mün 'a Nemi hã' mőkputox'ah, pa 'Amanãm tu hãpxop ta tu' yãg puxet paha', tu: "Püyã Topa xa hãmmaxnã," kaxiy. Yã Topa te 'Amanãm pu hãm'ãktux xex tap. ⁷Yã tik xexka xop te hãm'ãktux, ha tik kutõgnãg xop te hãm'ãpak. 'Ãxop te hãmyümmüg. Yiy Mëkiyenek te hãm'ãktux, ha 'Amanãm te' xupak. ⁸Ha 'ãmãnex xop te' yãg paha', tu hãpxip 'ihã' xakix, ha' nõy te' yãnãn tu' paha', tu mõktu xakix kamah, tikmũ'ün xohix putuk. Pa Topa te Mëkiyenek hi xe'e 'ãktux, ha mõnãyxop yõg hãpxop 'üyãg paha'. ⁹Yã Nemi te 'Amanãm mütik pago, ha' mőkputox te yãy yõg tikmũ'ün tu' pop. ¹⁰Tikmũ'ün te hãm'ãktux hu: Nemi müg tut te' put 'ohnãg, 'ihã' xuxyã 'Amanãm te Mëkiyenek pu pago, yiy Nemi te 'Amanãm mütik pago kamah. Kaxiy tikmũ'ün te hãm'ãktux. Yã mõnãyxop 'Amanãm te yãy putix pupi pago.

¹¹Iyaet yõg tikmũ'ün te Topa yõg xat'ax yümmüg, ha' xat'ax te 'ãmãnex xop 'ãktux, 'õhõm 'Anãm mőkputox, yã 'Anãm xop te Nemi hã' mőkputox, tu mõktu Topa pu' hãm, 'ap puxi'ah, 'ükuxa tupmã hok tu', yiy 'ãmãnex nõy nün, yã Yeyox Kunnix nün, tu Mëkiyenek putuk, tu 'Anãm yõg 'ãmãnex xop putuk 'ohnãg. ¹²Yã 'ãmãnex nõy, yì' xat'ax nõy kamah. ¹³⁻¹⁴Yã yümüg xuxyã Yeyox nün, nüy 'ãmãnex yõg hãm'ax hã' hãm, tu Yona xop yõg tihik, 'ap Nemi yõg tik'ah, ha Yot xop te 'ãmãnex yõg hãm'ax hã' hãm 'ohnãg, yã Möyyex te Yona xop xat 'ohnãg, pu tu hãm.

'ãmãnex xat'ax yã Mëkiyenek putuk

¹⁵Ãxop te hãmyümmüg'ax. 'Ünün 'ãmãnex nõy, tu Mëkiyenek putuk, 'ap Nemi hã' mőkputox'ah. ¹⁶Möyyex te' xat, pu Nemi mőkputox puxet hãm, nüy Yoneo yõg tikmũ'ün hã 'ãmãnex, ha tikmũ'ün te yãy kutnãhã', pu tu hãm, pãyã yümüg xuxyã te yümü'ã hã 'ãmãnex xexka', 'ühi kux 'ohnãg hã yümü'ã hã 'ãmãnex. ¹⁷Yiy Topa yõg tappet te: "Tik hittap Mëkiyenek yã 'ãmãnex, tu' kux 'ohnãg, hã kaxiy 'ãmün yã 'ãmãnex kamah, 'akux putup 'ohnãg!" kaxiy. ¹⁸Yiy Topa te' xat'ax nõãl. Yã tikmũ'ün pu'uk, 'a hãpxopmã max yümmüg'ah, tu' yìpkox pip Möyyex yõg xat'ax pu', Möyyex te' xat, ¹⁹pãyã yãy kuxa tupmã hok, pu tu max, tu hãmmax hip, pu Topa nünãl, puyiy tu yãy mütik ti mõ'kuma' mõg. Pãyã Yeyox nün, yiy yümü'ãte' hip, puyiy yümüg mõgã Topa yìkãgnãg hah.

²⁰Yã Topa te' xat, pu Nemi yõg 'ãmãnex xop tu hãm, pãyã nõm xop pu hãm'ãktux 'üm xex 'ohnãg, pu tu hãpxopmã kux. 'Amhok. ²¹Pãyã hãm'ãktux xex 'ãmãnex nõy pu', yã Yeyox mün pu hãm'ãktux xex, hu:

"Topa te xa hãm'ãktux xex,

tu yãy pu' hupmãp-tup 'ohnãg, tu:

'ãmün yã 'ãmãnex xe'e', 'ap 'ãkux 'ohnãg.' " Kaxiy.

²²Hu Yeyox mün yã 'ãmãnex xe'e', tu' pa'ax tũmnãg yõg 'ãmãnex, yã' pa'ax tup mün max xe'e', ha' pa'ax hittap mün miãx.

²³Üyõg 'ãmãnex xop xohix punethok, 'üxakix tu', yì' nõy mõxaha', nüy tu hãm. ²⁴Pa Yeyox hi mõ kuma' mõg, 'üxok putup 'ohnãg, yì' nõy nün 'ohnãg, nüy yãnãn tu tu' hãm, pãyã Yeyox yã 'ãmãnex yãp-xet, ²⁵tu hõnhã tikmũ'ün kuxa

kummuk xit'ax, xix häptup 'ihâ' xit'ax, 'ap kux'ah, tu nôm xop kuxa te Topa xak xop mō'nīynām, puyīy Topa yīkāgnāg hā nū'. Ha Yeyox te nôm pupi' xak, nūy mō'nīynām, yā' hi mō kuma' mōg, nūy Topa tu' xax, pu mō tu xape nīynām.

²⁶Hu Yeyox yā 'āmānex xat'ax xe'ēgnāg, ha yūmūg xohix tep-tup pax, ha hāpkummuk mīy 'ohnāg, yā' max xe'ēgnāg. Topa te Yeyox yāyktunāhā, tu' xut, tu' xexkanā xe'ēgnāg, pu pexkox yōg xop hā tu xexka'. ²⁷Ha 'āmānex xat'ax nōy te mō'āpxop hap, nūy Topa pu' haxyā', tu 'āmnīy tu xohix puxix mō'hap, puyīy yāy yōg hāpkummuk mīy'ax xaxogā', xix tikmū'ūn xohix yōg mīy'ax xaxogāhā. Pa Yeyox yāy pu mō'hap 'ohnāg, hāpkummuk mīy 'ohnāg tu', tu tu yāy mūn hōm, tu' xok 'āmnīy puxet 'ihā', nūy tikmū'ūn yōg hāpkummuk mīy'ax xaxogā', pu tu kux. ²⁸Ha Mōyyex te' xat, pu tik xop yīmōgatux, pu tikmū'ūn nō 'āmānex xat'ax, ha' max miāx, pa Topa te hām'āktux xex 'ūk-nāy tu', tuk-tok yā hāmyāyktunāhā, yā Topak-tok max xe'ēgnāg mō kuma' mōg.

Yeyox yā yūmū yōg 'āmānex xe'ēgnāg

8 ¹Yeyox mūn yūmū yōg 'āmānex xe'ēgnāg, yā pexkox tu' xip, tu Topa xexka xe'ēgnāg yīpxe'e hā' yūm, nūy nōm mūtik tu xexka'. Yā hāmyūmmūg xe'e 'ōhōm. ²Hōmā hāmyāxatamuk xohix 'ihā Yoneo yōg 'āmānex te Topa pet hā mō'nāhā', tikmū'ūn te nōm pet mīy topixxax ka'ok hā, pu tu xokxop hep 'ūm nūnnāy. Pāyā yūmū yōg 'āmānex xat'ax, tu' hām pexkox kopah, yā nō'ōm Topa xip'ax xe'e', tu pexkox tu' yūm.

³Topa te 'āmānex xat'ax xop xohix yīmōgatux, pu hāpxop xix xokxop mō'hap, nūy Topa pu haxyā', nūy Topa pu' hōm, yīy yūmū yōg 'āmānex xat'ax hām kamah, nūy Topa pu yāy mūn hōm, nūy yūmūg xohix pupi tu xok. ⁴Pax pu Yeyox hām tu' xihip, puxix yūmū'ā hā 'āmānex hok. Yā Mōyyex te' xat, pu mōnāyxop Nemi mōkputox tu tu' hām, nūy mō xokxop hāp, nūy Topa pu' haxyā', ha Yeyox yā Nemi yōg xop hā' puknōg. ⁵Ha Topa te Mōyyex xat, pu topixxax ka'ok xexka hā Topa pet mīy, tu' mīy'ax yūmmūgāhā', ha' mīy, ha' pet te pexkox yōg pet hā pet komut. ⁶Pa Yeyox te 'āmānex yōg hāpxopmā'ax mīy, tu' māynāg mīy, yā 'āmānex xat'ax xe'ēgnāg, hu' pa'ax tup mīy Topa mūtik, xix tikmū'ūn mūtik, Topa te hām'āktux xex ha' pa'ax mīy. Yā pa'ax hittap yōg max miāx, ha pa'ax tup yōg max xe'ēgnāg.

⁷Pax pu' pa'ax hittap tu ka'ok xe'ēgnāg, puxix pa'ax tup mīy hok, ⁸pāyā Topa te tikmū'ūn yūmmūg, ha hāpxopmā kummuk punethok, yīy Topa te:

“Āmnīy mō'nāp-tup, 'ihā 'āte pa'ax tup mīy'ax,

'Iyaet yōg tikmū'ūn mūtik mīy'ax,
xix Yona yōg tikmū'ūn mūtik mīy'ax.

⁹Yā' pa'ax nōy, 'ūtup, ha 'āte nōm hittap mīy mōnāyxop mūtik,
nūy mōgā', nūy hāpxexka 'Eyit tu 'ūxupmā',
pa mōnāyxop tek xaxok, tuk pa'ax xaxok kamah,
yīy 'ātep-tup nōg,” kaxīy.

¹⁰Tu xe hām'āktux, hu:

“Āte pa'ax tup mīy putup,

tu 'Iyaet yōg tikmū'ūn mūtik yōgnū hām'āktux xex putup,
 'āte tikmū'ūn putox tu' xex putup, xi' kuxa kopa' xex,
 'āte nōm tikmū'ūn hā Topah,
 hak mūn hā yā tikmū'ūn xe'e, 'ūyānān tu'.

11 Tute hāmyūmmūg putup, yā' xohix tek yūmmūg putup,
 hu' nōy yūmmūgā'ax hitop tu',
 'a hām'ūm 'āktux putup'ah, nūy: 'Topa yūmmūg.' Kaxīy.

Yā' xohix tek yūmmūg putup, 'ūk-tōgnāg xop tek yūmmūg nām,
 ha mōktu xexka xop tek yūmmūg nām.

12 Ha 'āte hāpkummuk mīy'ax xaxogāp-tup, pu tu kux," kaxīy.

13 Hāpxop kutut te yāy xaxogā tāmnāg, Topa te' pa'ax hittap kux, ha yāy xaxogā'ax, yīy pa'ax tup mīy.

Tikmū'ūn kuxa te' yēy Topa keppah

9 1 Nōm pa'ax hāmāxap te Topa pu nū'xup yūmmūgāhā', ha tikmū'ūn te Topa pet mīy, nūy Topa pu nū 'āxup, 'ūpa'ax te' pet mīy yūmmūgāhā',
 2 Ha Topa pet kox hā mōxakux hāmāxap, ha topixxax ka'ok xexka hā' mīy, ha' xuxet'ax mīy, hu: Topa xip'ax. Kaxīy. Ha kuyānām kup yūm, xix mīmpe xup, ha mīmpe yīmū pām mām, tu Topa keppa' mām. 3 Ha topixxax max te hāmyīkox nōy mō'yinnīn, ha' pet kox 'āxet'ax Topa xip'ax xe'ēgnāg, 4 ha' kopa' xup mīmpe', tu pipkup yānām hā mō'nīy, pu mīm xax mō'hap, xix mō xokxop hap, nūy Topa pu haxyā', ha' pa'ax yōg mīpkox yūm, ha pipkup yānām hā' mīy, tu mīpkox kopa nax māynāg yūm, ha' xit'ax 'āxet'ax māmāg xex nax kopah, yā pām putuk, xix mōnāyxop 'Anām yōg kup tōy xex mīpkox kopah. Hōmā mīxux te nōm kup tōy nak tu' xokax, Topa te hām'āktux hah, ha' xat'ax yōg mīkaxxap yūm mīpkox kopah, ha' xat'ax kax'āmī' mīkaxxap tu'. 5 Ha mīpkox yīmū' pip 'ūyōnnā'ī' 2, yā pekkox yōg yōnnā'ī hā' komut xop, tu Topa xip'ax yūmmūgāhā', 'ūyīmāg kup te mō'kox nīy, 'ōnte Topa te hāpkummuk mīy'ax xaxogāhā', pu tu kux. Yā' puxi'. 'Āte hām'āktux nōy putup kamah.

6 'Āmnīy xohix 'īhā 'āmānex xop te Topa xip'ax hā mōxakux, nūy 'āmānex yōg hām'ax hā tu' hām, 7 pa Topa xip'ax xe'ēgnāg hā mōxa 'ohnāg, yā 'āmānex xat'ax puxehnāg te' xip'ax xe'ēgnāg hā mō'nāhā', tu hāmyāxatamuk yōg 'āmnīy puxet, 'īhā Topa xip'ax xe'ēgnāg hā mō'nāhā', nūy xokxop hep 'āta nūnnāy 'ūxip'ax kopah, tu yāy mūn pu nū'nāhā', xix tikmū'ūn xohix pu nū'nāhā', pu Topa tikmū'ūn yōg hāpkummuk mīy'ax xaxogā', tikmū'ūn te hāpkummuk mīy hāmyūmmūg 'ohnāg tu', ha Topa te' xaxogāhā'. 8 Ha kaxīy Topa Koxuk te yūmū'ā hāmyūmmūgāhā nōmhā, 'ūyīy yūmūg yūmmūg max, yā 'āmānex xat'ax te xokxop hep nū'nāhā', puyīy tu hām mōnāy, pāyā tikmū'ūn nōy te Topa xip'ax xe'ēgnāg hā mōxakux 'ohnāg, yā Topa te' xat hok, pu xip'ax xe'ēgnāg hā mō tu xakux hok. 9 Ha 'āmānex te Topa pu mō'āpxop hap, xix xokxop, pu tikmū'ūn Topa pu nū'āktettex, pāyā 'ap te puxi'ah, yā tikmū'ūn kuxa 'ūm tupmā 'ohnāg. 10 Yā Mōyyex te' xat hok, pu' xit'ax 'ūm mā hok, xi' xat hok, pu xo'op'ax

'ūm xo'op hok, xi' xat, pu yāy xax pix, xix kânēy pix, nūy Topa pu maxnā', pāyā yāy kuxa tupmā 'ohnāg, hu' hip, puyīy Topa' kuxa kummuk tupmā'.

¹¹ Yīy Kunnix nūn, tu yāyhā 'āmānex xohix xat'ax, tu yūmū'ā hāmmaxnāhā', tu Topa pet xe'e kopa' hām, ha tikmū'ūn te nōm pet mīy 'ohnāg, 'ap hām xexka tu' yūm'ah, yā pekkox tu' yūm. ¹² Ha Kunnix nūn, tu' pet hā mō'nāhā yāp-xet, tu Topa xip'ax xe'ēgnāg kopa mō'nāhā', tu' hep 'āta nū'nāhā', pāyā 'a mūnūytut hep 'āta 'ūm nū'nā'ah, xix 'a mot hep 'āta 'ūm nū'nā'ah. 'Āmhok. Yā yūmūg pupi' xok, tu yāy hēp 'āta nū'nāhā', nūy yūmūg kuxa kummuk 'ūm xit, nūy tu mō kuxa max tat 'ūyānān tu', pu yūmūg hi xe'e, 'ap kux'ah. ¹³ 'Āmānex xop nōy te mot hep 'āta nū'nāhā', xix mūnūytut pit hep 'āte nū'nāhā', tu mūnūytut kutok pit mō'hap Topa pu', tu xogŷin putok nū'xok tikmū'ūn tu', pu tu nō xax maxnā Topa pu', nūy tu hāpkummuk xit, pu tikmū'ūn Topa keppa nū'āktettex, nūy kuxa' yēy. ¹⁴ Topa Koxuk hi xe'ēgnāg, tu Kunnix ka'ogāhā', pu tu xok mīpkupnix tu', tu yāy hep 'āta nū'nāhā', tu yāy mūn hōm Topa pu', nūy tikmū'ūn pupi tu' xok. Ha xokxop hep 'āta ka'ok kutōgnāg, tu tikmū'ūn kuxa kummuk tupmā hok, pa Yeyox yāy hep 'āta ka'ok xexka', tu yūmūg kuxa kummuk xit, tu yūmū yōg hāpxopmā'ax hitop kuxyā', nūy yūmūg ka'ogā', yūmū'āte hāpxopmā Topa xe'ēgnāg pu'.

¹⁵ Yīy Kunnix te tikmū'ūn xapit, pu Topa hā yāy xape xop, tu' pa'ax tup hā' xape, puyīy Topa nōm pu hāmmaxnā', tute nōm xop xānāhā', nūy tu hāmmaxnā mō'kuma' mōg, tu hām'āktux xex tap. Kunnix xok, hu tikmū'ūn mōy pu mōg Topa yīkāgnāg hā, nūy hāpxopmā kummuk kux, yā hōmā' mīy, 'ūpa'ax hittap xip, 'ihā' mīy.

¹⁶ Tikmū'ūn xok putup, ha yāy xape te' yōg hāpxop xohix pop putup, yīy tappet tu kax'āmi', pu tikmū'ūn xexka xop mō'kupix, nūy yūmmūg, nūy tu' xape xop pu hāpxop popmā'. Ha' xok, puxi' xexka xop 'ūyōg hāpxop popmā', tik xape xop pu' popmā', tappet tu' kax'āmi tap hah, tu ta' xok xe'e'. ¹⁷ Nōm tikmū'ūn hi', ha ta' pop 'ohnāg, pa' xape xop hip, pu tu xok, ha tappet pu'uk. Pa tikmū'ūn xok, puxix tappet ka'ok, tu' yōg hāpxop popmā'ax yūmmūgāhā', pu tu xape xop pop. ¹⁸ Hā kaxīy 'ūpa'ax hāmāxap te' xat, pu kokxop kix Topa pu, nūy hep 'āta nūnnāy. ¹⁹ Mōyyex te' xat'ax 'āktux hāmāxap tikmū'ūn pu', tuk-nāy tu mūnūytut pit xix mot kix, tu' hep 'āta kanop kōnāg hā, tu nū' xok, pu topixxax nōm 'āta xup, nūy nū'xok, xix mīxux 'ixop hā nū'xok, tu' xat'ax yōg tappet yīmū nū'nāhā, xix tikmū'ūn xohix yīmū nū'nāhā', ²⁰ tu: "Topa yōg pa'ax ka'ok, yīy 'āte nūhū hep 'āta nū'xok, xa 'āxop xohix pēnā', nūy 'āyīpkox pi pa'ax tu'," kaxīy. ²¹ Kaxīy Mōyyex te' xat, pu' hep nū'nā Topa pet kopah, xix Topa xak'ax yōg kânēy tu nū'xok. ²² Yā' xat, pu' hep 'āta nū'xok, pu hāpxop tu max Topa pu'. 'Ūhep 'āta puxehnāg hā Topa te hāpkummuk mīy'ax xaxogāhā', pu tu kux.

Yā Kunnix te yūmūg kuxa kummuk xit, 'ūxok tu'

²³ Mōnāyxop Mōyyex te' xat, pu Yoneo 'āmānex hep 'āta nū'xok Topa pet yōg hāpxop tu', puyīy tu hāpxop maxnā Topa pu'. Tu kokxop hep nū'xok, nūy hāpxop

maxnã, xix xogyĩn putok nũ'nãhã, nũy tikmũ'ũn xax maxnã Topa pu!, pãyã nõm hãmmaxnã'ax te tikmũ'ũn kuxa kummuk tupmã 'ohnãg, yĩy Kunnix xok, yũmũg pupi' xok, nũy yũmũg kuxa maxnã Topa pu!, tu yãy hep 'ãta nũ'nãhã, nũy pexkox yõg hãpxop maxnã Topa pu kamah. ²⁴Yĩy Kunnix xok hãmãxap, tuk-nãy tu pexkox yõg pet xe'e hã mõktu mõ'nãhã, tikmũ'ũn te nõm mĩy 'ohnãg, ha Topa yĩpxe'e ha' yũm nũy yũmũg pupi hãm'ãktux Topa pu!. ²⁵Yoneo xop yõg 'ãmãnex xat'ax te Topa xip'ax hã mõ'nãhã, tu hãmyãxatamuk xohix 'ĩhã mõ'nãhã, tu hãmyãxatamuk yõg 'ãmniy tup-xet 'ĩhã mõ'nãhã, tu Topa xip'ax kopa mõ'nãhã, tu xokxop hep 'ãta tat 'ũxeheh. Pa Kunnix xok puxe'nãg, ²⁶nũy tu' xũy puxet, tu' xok, nũy tikmũ'ũn kuxa kummuk tu xit, 'ap xep xok'ah, yã' kux, yã' puxi!. ²⁷Uhep xop xohix xakix puxet, hak-nãy tu Topa te' yõg hãpxopmã'ax kopit putup, 'ok pe hãpxopmã max, 'ok pe' kummuk, tu' kummuk xop pu hãpkummugãp-tup, nũy tu yãnãn, tu' max xop pu hãmmaxnãp-tup 'ũyãnãn tu!. ²⁸Ha kaxĩy Kunnix xok 'ãmniy puxet 'ĩhã, nũy hãm xexka xohix yõg hep xop xohix pupi tu' xok, nũy hãpkummuk mĩy'ax xaxogã, 'ap xep xok putup'ah, pãyã putpu' nũn putup, nũy yãy yõg tikmũ'ũn hãm tu' mõy, puyiy nũ mũtik tu pip ka'ok, tu' hip nõmhã, pu nũ'.

10 ¹Mõyyex te 'Iyaet yõg tikmũ'ũn xat, pu mõ xokxop hap, nũy haxyã, ha' xat, nũy tikmũ'ũn pu hãmyũmmũgã, puyiy 'ãmãnex xe'e hip, nõm te tikmũ'ũn pupi' xok'ax. Yã Yeyox Kunnix mũn yũmũ yõg 'ãmãnex xe'e, tu yũmũ'ã hãmmaxnãhã. 'ãmãnex xop te mõ xokxop hap pax, yã hãmyãxatamuk xohix 'ĩhã mõ'hap, tu tikmũ'ũn kuxa kummuk tupmã 'ohnãg. Yã tikmũ'ũn xak, nũy yãy kuxa maxnã Topa pu!, puyiy Topa yĩkãgnãg hã' mõg, pãyã yãy kuxa tupmã hok. ²Pax pu tikmũ'ũn hãpxop mõ'hap'ax hã' yãy kuxa tupmã Topa pu!, puxix hãpkummuk mĩy'ax xaxogã, ha hãpxop mõ'hap'ax kuxyãhã, ³pa tikmũ'ũn te hãpxop mõ'hap, nũy Topa pu haxyã, ha mõ'hap'ax te yãy yõg hãpxopmã'ax kummuk xutigãhã, yĩ' xaxok 'ohnãg, tu hãmyãxatamuk xohix hã xe mõ'hap, tu xe mõ'hap, ⁴Mũnũytut hep 'ãta, xix mot hep 'ãta te hãpkummuk mĩy'ax xaxogã 'ohnãg.

⁵Yĩy Kunnix nũn, tu yiy hãm tu' nũn 'ĩhã, tu' Tak Topa pu hãm'ãktux, hu: "ãtak, xatep-tup'ah tikmũ'ũn te xokxop mõ'hap, nũy tu haxyã', pak yĩn mĩy.

⁶'Ap 'ãkuxa hittup'ah, 'ĩhã tikmũ'ũn te 'ãkeppa mõ'hap, puyiy hãpkummuk mĩy'ax xaxogã'.

⁷Yiy 'ãte hãm'ãktux, hu: 'Yãk xip, Topah, tuk nũn, nũy 'õg putup'ax mĩy, ha kaxĩy tik te' xat'ax yog tappet tu kax'ãmi!, nũy 'ũgmũn 'ãktux," kaxĩy.

⁸Tu hãm'ãktux hãmãxap, hu: "Xatep-tup'ah tikmũ'ũn te xokxop mõ'hap, nũy haxyã, 'Ap 'ãkuxa hittup'ah, 'ĩhã tikmũ'ũn te 'ãkeppa mõ'hap, nũy hãpkummuk mĩy'ax xaxogã," kaxĩy. Tup-tup 'okpa' xat'ax te' xat. ⁹Tuk-nãy tu hãm'ãktux, hu: "Yãk xip, Topah, tuk nũn, nũy 'õg 'ũm putup'ax mĩy," kaxĩy. Yã kaxĩy Topa te mõ'hap'ax hitop kuxyãhã, nũy Kunnix 'ãktux 'ũyãnãn tu!, ha yũmũg pupi' xok.

¹⁰Yeyox Kunnix te Topa pu! yĩpkox pip, hu yũmũg kuxa kummuk tupmãhã, yã 'ãmniy puxet 'ĩhã' xok, tu yũmũg pupi' xok mĩpkupnix tu!, 'a xep xok'ah.

¹¹Yoneo yōg 'āmānex xop xohix hām, tu 'āmñiy xohix 'ihā' hām Topa pet kopah, tu mō hāpxop hap punethok, xix xokxop mō'hap punethok, nūy Topa pu' haxyā', pa mō'hap'ax te yūmūg kuxa tupmā hok. 'Āmhok.
¹²Yīy Yeyox xok yūmūg pupi', 'āmñiy puxehnāg 'ihā' xok, tu xehomip xok 'ohnāg, yā' puxi', 'ūkux, ha Topa yīpxe'e hā' yūm, nūy nū mūtik tu' xexka',
¹³tu' hip, pu Topa tu ta tu gāyxop nōā', tu' kummugāhā 'ūyānān tu', puyi' xohix yīpkox pi Yeyox xat'ax pu'. ¹⁴Ha Yeyox xok puxet, nūy tikmū'ūn kuxa tupmā, pu kuxa tu max Topa pu', yīy hōnhā Topa yīkāgnāg hā' pip.

¹⁵⁻¹⁶Ha Topa Koxuk te hām'āktux hāmāxap, tu tikmū'ūn kuxa tupmā'ax 'āktux, hu:

“Hāmyāxatamuk xohix nōg, kopxix pa'ax nōy mīy, yā Topa te' xuktux, tu yā yōgnū xat'ax xex putup, tikmū'ūn putox tu' xex putup, xi' kuxa kopa' xex putup,” kaxīy.

¹⁷Tuk-nāy tu hām'āktux, hu: “Āte' xaxogāp-tup 'ōg hāpkummuk mīy'ax, xix 'ōg hāpkummugā'ax 'āte' xutigā 'ohnāg,” kaxīy. ¹⁸Tu hāpkummuk mīy'ax xaxogāhā, ha' kux, 'ap xe mō'hap'ah, 'ap xehomi xokxop mō'hap putup'ah. Yā' puxi'.

Topa yīkāgnāg hā yūmūg pip

¹⁹Yīy yūmūg mōg Topa keppah, nūy nū mūtik hām'āktux. Yā Yeyox Kunnix xok yūmūg pupi', nūy yūmūg nūnnā', 'ūyīy yūmūg mōg, nūy Topa mūtik hām'āktux, tu kuxānōg 'ohnāg.

²⁰Hōmā topixxax max te nōm hāmyīkox mō'yīnnīn, pu tikmū'ūn mō tu xakux hok, ha Yoneo yōg 'āmānex xat'ax te' xut, nūy mōnāy, ha kaxīy Yeyox xok, yūmūg pupi' xok, nūy yūmūg mōgā Topa yīkāgnāg hā', nūy yūmūg hi xe'ēgnāg.

²¹Ha yūmū yōg 'āmānex xe'ēgnāg te Topa pet xe'ēgnāg kopa' xat, tu pekkox tu' xat, 'ūxuxet'ax Yeyox Kunnix. ²²Āpu yūmū mōg Topa yīkāgnāg hā, pāyā yā yūmūg kuxap-xet, tu yāy pu mō'āmā hok, 'ūmām ka'ok tu', Topa te yūmū yōg hāpkummuk mīy'ax xaxogā hah, pu tu kux, ha yūmūg putox pix, 'ū yūmū hāpxopmā kummuk kux, 'ūyīy yūmūg hāpxopmā max 'ūyānān tu'. ²³Topa te hām'āktux xex, 'āpu yūmūg kuxa mām ka'ok nōm hām'āktux kopah, Topa te yā koit 'ohnāg, yīy 'ūgmū'āte' hip, pu Topa yūmū'ā pekkox yōg hāpxop popmā', ha yūmūg nōy pu' xuktux. ²⁴Āpu, yūmūg xape kuxa ka', nūy 'ūm hāk tehet, 'ūp-tup pax tu', nūy tu xape hā hāmmaxnā'. ²⁵Ūkuxa mām ka'ok xop te yāyko'tinnā' pip, ha ta mōy kamah, nūy nōm xop mūtik pi', nūy Topa pu hām'āktux. 'Ūxaxok hok. Tikmū'ūn nōy mōg'ax kuxyāhā, 'a' max'ah. Pāyā 'āmōg pax, nūy 'ānōy mūtik Topa tu 'ākax, nūy mō yāy nīynām. Yā yūmūg xuxyā nūn putup, yīy yāy tu nū'nā' pax.

²⁶Topa te xa hāmyūmmūgāhā, yīy 'āxop te' yōg hām'āktux xe'e yūmmūg, hu hāpkummuk mīy kux, nūy xehomip hāpxopmā kummuk hok, 'ūp-tup hu' mīy hok, ka Topa 'ōg hāpkummuk mīy'ax xe xaxogā hok. Pāyā' xax, xa Topa pu hāpxopmā max. Yā Kunnix xok tap, xayīy 'āxop hāpkummuk mīy'ax kux. ²⁷Hu 'ākuxānōg, yā Topa te 'ōg hāpxopmā'ax kopit putup, tu kuxap xe'e hā' gāy xop kix xexkap-tup, yā Topa te' yīpkox hok xop nōāp-tup kuxap xe'e hā. ²⁸Yoneo

yōg tikmũ'ün hittap te Mōyyex yōg xat'ax pu' yīpkox 'ohnāg, tu hāpkummuk mīy pax, tikmũ'ün nōy 2, pe 3 te' pēnā', puxi' xexka xop nōm putex, tu' kuxa ka 'ohnāg. ²⁹Topa te putep-tep mīy putup, 'Ihā tikmũ'ün te nōm kutok putup nōg? Yā nōm kummuk xop te Yeyox hep 'āta kutōgnāg pe'paxex, hu: “Yāk-tōgnāg, pu Yeyox Kunnix 'ūgkuxa tupmā,” kaxīy. 'Ūyīpkox hok, puxix Topa' yānān tu' kummugā xexka', hāpkummuk xexka mīy ha'. Yā Topa Koxuk te mō'yāy xe'ēgnāg, ha tikmũ'ün te Topa Koxuk kummuk 'āktux, tu' mānōg, puxix Topa' yānān tu' kummugā xexka', hāpkummuk xexka mīy hah. ³⁰Yūmũ'āte hāmyūmmūg, tu Topa te hām'āktux yūmmūg, ha: “'Āte hāpkummugāp-tup 'ūyānān tu', nūy tu nōy yōg kummuk mīy'ax tu pago,” kaxīy. Tu xe: “Topa te yāy yōg tikmũ'ün yōg hāpxopmā'ax kopit putup, nūy nō hāpxopmā'ax yūmmūg, 'ok pe max, 'ok pe kummuk,” kaxīy. ³¹Topa gāy tikmũ'ün tu', tikmũ'ün te hāpxopmā kummuk tu' gāy, yīy 'ākuxānōg, nūy Topa xe'ēgnāg gāyā hok.

³²Hōmā Topa te xa hāmyūmmūgāhā', ha 'āxop xūy, ha' kummuk xop te 'ākummugāhā', pāyā 'ākuxa tuknōg 'ohnāg. 'Ūxaxok hok. ³³Ha' gāy xop te' yāg mānōg, tu' xūyāhā', pu tikmũ'ün xohi' pēnā', ha' yāg nōy xūy 'ūnōy xop mūtik, yā 'ākuxap-xet 'ānōy kuxa mūtik. ³⁴Tu kanet kopa' pip xop kuxa ka', tu 'ākuxa hittup 'Ihā' kummuk xop te 'ōg hāpxop xohix hā' xupxet, hāmyūmmūg tu hā hittup, yā 'ōg hāpxop māynāg pip ka'ok pexkox tu', ha' nōg 'ohnāg. ³⁵Yīy 'ākuxa tuknōg hok, ka Topa yōg putat xax, ha Topa te xa hāmmaxnā xekap-tup 'ūyānān tu'. ³⁶Hāpxopmā'ax ka'ok hā' tot, nūy Topa pu 'āyīpkox pi', nūy nōm putup'ax mīy, xayīy pexkox yōg hāpxop pop, yā Topa te xa hām'āktux xex. ³⁷Yīy Topa yōg tappet te:

“Nāy. Hāpxip kutōgnāg kopxik nūn putup mō'ka'ok.

³⁸Ha tikmũ'ün te hāmyok mīy, tu' kuxa mām ka'ok, puxix tu hi xe'e', pa tikmũ'ün te yōgnū putat xak, nūy putpu' mōg, kopxik kuxa hittup 'ohnāg,” kaxīy.

³⁹Pa yūmũ'āte Topa yōg putat xak putup'ah, hu yāy 'ūm nōāp-tup'ah. 'Āmhok. Yūmūg kuxa mām ka'ok, nūy yūmūg hi xe'e', nūy Topa yōg putat hā yūmūg mō kumak mōg.

Tikmũ'ün kuxa mām ka'ok Topa kopah

11 ¹Yūmūg kuxa mām ka'ok Topa kopah, hu hāmmax hip, pu Topa pexkox yōg hāpxop yūmũ'ā' popmā', ha ta yūmũ'āte nōm hāpxop pēnā hok nōmhā. ²Yā mōnāyxop hittap kuxa mām ka'ok kamah, yīy Topa tep-tup pax.

³Yūmūg kuxa mām ka'ok, hu hāmyūmmūg, yā Topa te pexkox mīy xix hahām, yā hāpxop xohix mīy, hām'āktux'ax hā' mīy, tu hāpxop pēnā hok hā hāpxop mīy, pu tikmũ'ün pēnā'.

⁴Yā mōnāyxop hittap 'Ameo kuxa yūm ka'ok, hu mō kahnēn hap, nūy Topa pu haxyā', ha Topa tep-tup pax, pāyā' taknōy Kāyīy yōg mō'hap'ax putup 'ohnāg. Ha 'Ameo te hāmyok mīy, 'ūkuxa yūm ka'ok tu', ha Topa tep-tup pax, ha yūmũ'ā hāmyūmmūgāhā'.

⁵Xix mōnāyxop hittap 'Ēnōg kuxa yūm ka'ok, hu' xok 'ohnāg. Yā Topa te hām tu' xut, nūy pexkox ha' mōgā', ha tikmū'ūn te 'Ēnōg xak, nūy tu pēnā', pa' pēnā'ah, ha' kux. Ha Topa yōg tappet te: “Topa te 'Ēnōg putup pax,” kaxiy. ⁶Tikmū'ūn kuxa yūm hok, puxix Topa nōm putup nōg. Pāyā tikmū'ūn kuxa yūm ka'ok tu: “Yā Topa xip!” kaxiy, tu Topa xak, puxix Topa nōm tikmū'ūn ha hāmmāxnā'.

⁷Xix mōnāyxop hittap Nōe kuxa yūm ka'ok, hu Topa te nōm pu hāmyūmmūgāhā', tu 'āmnīy mō'nā'ax yōg hāpxopmā'ax yūmmūgāhā', ha' yīpkox xip, tu mīpkox xexka mīy, kōnāg xexka yīmū' mōgāhā', pu nōm mōnāy, nūy kopa' pi', xi' xape xop te' kopa' pi', nūy kōnāg hā mō' tutnā hok, puyīy tu xakix hok. Ha kaxiy Nōe te Topa hā' puknōg xop yā' kummuk 'āktux, 'ūkuxa mām 'ohnāg hah, ha Topa te Nōe kuxa tupmāhā', 'ūkuxa yūm ka'ok hah.

⁸Xix mōnāyxop hittap 'Amanām te Topa te' xānā'ax 'āpak, tu' yīpkox xip, hu' mōg hāptox ha, Topa te hām'āktux xex hah. Ha' kuxa yūm ka'ok, tu yāy yōg hām nīm, tu piyā' mōg yūmmūg, 'okpa' mōg, ⁹tu' kuxa yūm ka'ok, hu' puknōg xop mūtik tihi', ha Topa te 'Amanām pu nōm hām xexka hōm putup. Tu topixxax ka'ok hā' pet, 'ūk-tok 'Iyak mūtik, hak-tok Yako pet kama topixxax ka'ok hā, ha Topa te nōm mūtik hām'āktux xex kamah, nūy tu hāpxexka hōm. ¹⁰Yā 'Amanām te' hip, nūy Topa yōg kōmēn xe'e tu' xihip, ha pexkox tu' yūm kōmen, ha' koxyōy hok, Topa te' mīy hah.

¹¹Xix mōnāyxop hex Xat kuxa yūm ka'ok kamah, huk-tok put, tu ta kutut, tu Topa yōg hām'āktux xex yūmmūg, tu' kuxa yūm ka'ok, pu Topa 'ūk-tok putnā. ¹²Hā kaxiy 'Amanām kutut, tu' pu'uk, pāyā' mōkputox xohix xexka punethok, māyōnnāg putuk, xix hāpkux yōg 'āmot xohix putuk.

¹³Ha nōm xop kuxa mām ka'ok, tu mōktu' xakix, tu Topa yōg hāpxop 'a' pop'ah, pa hāptox tu' pēnāhā', tu hāmyūmmūg, tu yāy mūn puknōg 'āktux, tu hāmyāxatamuk xohix hā hāpkumep, tu' pet 'ohnāg hām xexka tu', ¹⁴tu hām'āktux, tu yāy yōg hahām xak pexkox tu', ¹⁵a putpu' mōg putup'ah. Pax pu yāy yōg hām hittap xax, nūy putpu' mōg, puxi' mōg, ¹⁶pap-tup nōg, tu pexkox tu hām nōy xak, nūy ta tu' pi', ha Topa te nōm tikmū'ūn hā Topa xe'ēgnāg, tu nōm tu yāyhāhup 'ohnāg, hu kōmēn xe'ēgnāg mīy pexkox kopa, tu ta tu tu' pip ka'ok.

¹⁷Xix 'Amanām kuxa yūm ka'ok, yīy Topa te' yōg hāpxopmā'ax kopit, tu' xat, puk-tok 'Iyak mō'hap, pu Topa 'Amanām kuxa kopit, nūy ta tu hāmyūmmūg, 'ok pe 'Amanām yīpkox xip, 'ok pe' yīpkox 'ohnāg. Hōmā Topa te hām'āktux xex tap, ha 'Amanām mōkputox punethok 'āktux, pa 'Amanām yīpkox xip, tu mōk-tok puxehnāg hap'ax, ¹⁸'ihā' kuxa yūm ka'ok hām'āktux xex'ax kopah, ha: “'Āk-tok 'Iyak hā 'āmōkputox tu punethok,” kaxiy. ¹⁹Pa 'Amanām te Topa yūmmūg, tu tikmū'ūn putpu hīnnā'ax yūmmūg, Pax puk-tok xok, puxi' tak putpu' put, ha 'Amanām kuxa yūm ka'ok.

²⁰Xix mōnāyxop 'Iyak kuxa yūm ka'ok, hu Topa te hāmmāxnā'ax 'āktux 'ūk-tok Yako pu', xik-tok 'Eyao pu' xuktux,

²¹Xix mōnāyxop Yako kuxa yūm ka'ok, tu' xok putup, 'ihāk-tok Yoye kutok pu hāmmāxnā'ax 'āktux, tu kup tōy tu' xup, 'ihā' kuxa te' yēy Topa keppah.

²²Xix mōnāyxop Yoye kuxa yūm ka'ok kamah, tu' xok putup, 'ihā 'āmnīy mō'nā'ax 'āktux, tu tikmū'ūn te hāpxexka 'Eyit tu nū'pa'ax 'āktux, tu' xat, pu' yōg xokxax mō'tat, nūy hāpxexka nōy tu nō hāpktot.

²³Ha tik te hāpxexka 'Eyit yōg tikmū'ūn xohix xat, tu xonat xop xat, pu 'Iyaet yōg tikmū'ūn kutok pit xop xohix kix, 'ihā' tut te' put, ha mōnāyxop Mōyyex mūg tak, xi' mūg tut tek-tok pit put, tu' xaptop, tu mēy 3 hā' xaptop, puyiy xonat xop pēnā hok. Yā māynāg kaxxop, yī' tak xi' tut te' xat'ax pu yīpkox 'ohnāg, tu' xaptop, puyi' gāy xop 'ūk-tok putex hok.

²⁴Xix Mōyyex kuxa yūm ka'ok, tu' tuk, tu mōktu xiptap, tu' xat'ax kutok hex nīm, pu tikmū'ūn te yā' xat'ax kutok hex kutok 'āktux hok, ²⁵Yāp-tup, tu Topa yōg tikmū'ūn mūtik xūy putup, tu hāpkute'ex kummuk putup nōg, ²⁶tu hāmpel'paxex, hu: "Yā' max Topa yōg yīmōgatux xop hāk xūy, pāyā' kummuk, 'āte hāpxexka 'Eyit yōg tayūmak xohix pop," kaxiy. Tu pexkox yōg hāpxop puxet xak, puyi' pa'.

²⁷Yā' kuxa yūm ka'ok 'ihā hāpxexka 'Eyit nīm, tu tik te' xat'ax yīpkutuk 'ohnāg, xi' gāy'ax yīpkutuk 'ohnāg, tu mō'kuma' mōg, tu Topa 'ātigāhā', 'ihā' pēnā hok, ²⁸tu' kuxa yūm ka'ok, tu 'āmuk xexka hāmāxap mīy 'ūxuxet'ax Nōā'yēn, ha' xat, pu hāmyāxatamuk xohix 'ihā' mīy, tu' xat, pu kahnēn hep 'āta hā mō'yīnnīn'ax muk, pu pexkox yōg nū'kutnā'ax mō tu nā hok, nūy tikmū'ūn kutok hāmāxap xohix kix hok.

²⁹Xix 'Iyaet yōg tikmū'ūn kuxa mām ka'ok, hu kōnāg xexka 'Āta xak, ha hāmnaq, tu' xup 'ohnāg, 'ihā tikmū'ūn te' xak. Ha 'Eyit yōg xonat xop xak putup, ha ta kōnāg xexka te mō'nīy, ha kōnāg hāp nūm, tū kopap-nūm.

³⁰Xix 'Iyaet yōg tikmū'ūn kuxa mām ka'ok, tu kōmēn xexka Yenikot yīmap hā' mōg, tu xe' mōg, tu mōktu xohix te 7, ha kōmēn hām'āta ka'ok, tu kōmēn xohix yīmap, tu yāy koxyōy, ha': No! ³¹Xi' xotit Ha'ap kuxa yūm ka'ok, ha ta 'Iyaet yōg tik 2 te kōmēn puknōg Yenikot ha' nūn, nūy puknōg yōg kōmēn pēnā', ha Ha'ap te tik pēnā'ax 2 xaptop, puyiy xonat xop kix hok, yiy Ha'ap 'a xok'ah, pāyā Yenikot yōg tikmū'ūn xohix xakix.

³²Āte putep mūn 'āktux'ax? Yā hām'āktux tox 'ātep-tup'ah, nūy Yine'ām 'āktux, xix Manak 'āktux, xix Xānxām 'āktux, xix Yepte 'āktux, xix Namix 'āktux, xix Xāmō'eo 'āktux, xix Topa pupi hām'āktux'ax xop 'āktux. ³³Ūxohix kuxa mām ka'ok, hu hāpxexka yōg tikmū'ūn xohix mūtik yāytuk-mīy, tu hām paha', ha' mōg, ha hāpxopmā max, yiy Topa te tu' hāpxop popmāhā', hām'āktux xex tu tu' popmāhā', ha Topa te' ka'ogāhā', pu tu hāmgyā yīkox mō'yīnnīn, pu' kix hok, ³⁴ha kuxap xexka kuxyāhā', tu' xupaha', pu mīkax xexka hāp-tex hok, ha' pu'uk, ha Topa te' ka'ogāhā'. Yā' puknōg xop mūtik yāykix tu mōktu hām paha'. ³⁵Ha 'ūn kuxa mām ka'ok, yī' xape te putpu hi', 'ūxakix ka'ok, tu putpu' hi'.

Ha' gāyxop te' yāg xūyghāhā', tuk-te'ex kummuk, tu mōktu' kix, ha' xupmāp-tup 'ohnāg, nūy tu hi xe'ēgnāg. ³⁶Ha' gāyxop te' yāg pu' hupmāhā', tu' kix kakixnāg, tu' yāg nōy hīy, nūy kanet kopa nū'xok, ³⁷tu' yāg nōy kix mīkaxxap putux hā, xi' yāg nōy pot xehot hā', xi' yāg nōy kix mīkax xexka hā. Ha hāpkumep hitop tu', tu kahnēn xokxax mō'tat, xix mot xokxax mō'tat, tu hām hok, ha' xūyghāhā', tuk-te'ex

kummuk, ³⁸ha hām panip tu hāpkumep, tu yīktix pepi' mōg, tu hāpkox kopa' pet. Tu' max, ha hām xexka yōg Topa hā' puknōg xop kummuk.

³⁹Ha' kuxa mām ka'ok, yīy Topa tep-tup pax, tu nōm pu hām'āktux xex, pa Topa yōg hāpxop 'ap pop'ah. ⁴⁰Yā Topa te nōm xop hipmāhā', pup-xehnāg hā' pop hok, pāyā' hip, nūy yūmūg mūtik pexkox yōg hāpxop xohix pop.

Topa te yūmū'ā hā 'Ātak

12 ¹Yā nōm tikmū'ūn xohix te' hip, 'ūyīy yūmūg kuxa mām ka'ok, yūmūg xape hittap kuxa mām ka'ok putuk, 'ūyīy yūmūg xohix pexkox yōg hāpxop pop. Yūmūg mōg mō'ka'ok Topa yōg putat hā, kopxix hāpxop putux nīm, nūy mōg xupmān. Yā kaxīy yūmū'āte hāpkummuk mīy hok, nūy Topa puk yīpkox pi'. Yā hāpkummuk mīy'ax te hāpxop putux putuk, yīy mīy hok, 'ūyīy yūmūg mōg mō'ka'ok Topa yōg putat hā', tu kuxānōg 'ohnāg. ²Yeyox pe yūmūg paxeh, 'ihā yūmūg mōg. Yā Yeyox mūn te yūmūg kuxa māmāhā', 'ūyīy mām ka'ok nōm kopah, ha yūmūg ka'ogāhā', 'ūmōg Topa yōg putat hā yūmūg. Yeyox kuxa tuknōg 'ohnāg, tu' xok mīpkupnix tu', yūmūg pupi' xok, tu' xūy xexka', pāyā yāy pe'paxex, hu: "Yāk xūy kutōgnāg," kaxīy, 'ihā' gāy xop nōm pu' hupmāha'. Pāyā Yeyox kuxa hittup xexka', tu Topa hip tu', pu Topa pexkox yōg hāpxop popmā', ha Topa yīpxe'e hā' yūm nōmhā, nūy yāy 'Ātak mūtik tu xexka pexkox kopah.

³Yeyox yāy xūy'ax pe tu paxeh, xi' kummuk xop gāy'ax pe tu paxeh. Yā Yeyox xūy punethok hā' tot, 'ūyīy kamah yūmūg kuxa tuknōg hok, nūy Topa yōg putat xak hok. ⁴'Āxop te yāy putup'ax mīy kutōgnāg. Topa pu 'āyīpkox pip, pāyā kama yāy putup'ax mīy. Yā' max xa Topa putup'ax puxet mīy, xayīy hāpkummuk mīy'ax xohix tu kux.

⁵'Ok 'āxop te Topa yōg hām'āktux xaxok? 'Āxop yā Topa hā 'āk-tok xop, yīy xa hām'āktux, hu:

"Xonnē', 'ūg'āpax! 'Ākuxa tuknōg hok 'āte 'āmānōg hah.

⁶ Yā 'āmānōg, nūy xa hāmyūmmūgā', xayīy 'āmax,

'āmūn yāk mūn hā 'āk-tok xop tu',

ha mō'āyāy xe'ēgnāg," kaxīy.

⁷'Āxūy, tu xa hā' tot, Topa yā 'āxop hā 'Ātak, tu xa hāmyūmmūgāhā', 'ōg 'ātak putuk. 'Ok xip kaxop 'ūm, 'ūyōg 'ātak te nōm mānōg hok? 'Ap xip'ah.

⁸Pax pu Topa 'āmānōg hok, yīy ta 'āxop 'a Topak-tok'ah, hak-tok xohix mānōg, nūy tu hāmyūmmūgā', puyīy hāpxopmā max 'ūyānān tu'. ⁹Yūmūg tak xohix te yūmūg mānōg, nūy tu hāmyūmmūgā', ha yūmūg yīpkox pip, tu' tak max pekpaxex. Yīy 'āpu yūmūg Tak Topa pu 'āyīpkox pi', xayīy 'āhi xe'ēgnāg. ¹⁰Yūmūg tak te yūmū'ā hāmyūmmūgāhā', 'ihā yā yūmū'ā hā kaxop, hāmyok tu hāmp'e'paxex hah, pa Topa te hāmyūmmūgāhā' 'ū yūmūg tu max, nūy Topa putuk yūmūg tu max xe'ēgnāg. ¹¹Topa te yūmūg mānōg, ha yūmūg kuxa hittup 'ohnāg, pa hāpxip kutōgnāg, 'ihā yūmūg kuxa mām, ha yūmū'āte hāpxopmā max, tu hāmyok mīy 'ūyānān tu'.

Topa te hāmyūmmūgāhā'

¹²Āyok, 'āknīhā xihip, 'ākuxa tuknōg hok, nūy Topa yōg putat hā mōg. ¹³Tu hāmyok hā mōg, nūy tikmū'ūn pu'uk mōgā max, nūy nōm ka'ogā'.

¹⁴Tikmū'ūn te 'āyīmap hā' pip, yīy nōm mūtik yāytuk-mīy hok, pāyā hāpxopmā max, xayīy Topa pēnā'. Yā hāpxopmā'ax kummuk xop te Topa pēnā hok. ¹⁵Topa te xa hāmaxnāhā', 'ōg pa 'āti', nūy Topa yōg putat xax hok, xa tikmū'ūn kummugā hok, xix xūygā hok, ka 'āxop mīnta xūy putuk, nōm te tikmū'ūn xūygāhā', yā 'ānōy pu' xūygā hok. ¹⁶Ōg pa 'āti', nūy 'ānōy hā xupxet hok, xix Topa yōg hāpxop 'āktux kummuk hok, 'Eyao putuk. Tik hittap 'Eyao yā mōnāyxop 'Iyak kutok hāmāxap, tu yāy tak yōg hāpxop xohix pop'ax. Ha Topa te hām'āktux xex tap, tu 'Iyak kutok hāmāxap ha hāmaxnā'ax. Pāyā 'Eyao kummuk, tu' tak yōg hāpxop pe'paxex 'ohnāg, 'ap hāmaxnā'ax 'ūm putup'ah, yīy 'ūxohix nōy yānān, tu' taknōy kuhmōy Yako mūtik nōy yānān, nūy 'āmuk kutīgnāg pa', 'ūp-tup xūy tu'. ¹⁷Āxop te mōnāyxop yōg hām'āktux yūmmūg max. Hāpxip 'īhā 'Eyao te hāmpē'paxex, tu yāy tak yōg hāpxop xak, xix hāmaxnā'ax xak, hu xe yā nō' nōy yānān putup, tu' potaha', tu' xak, pāyā' kux. 'Ap xe' nōy yānān'ah.

¹⁸Āxop te Topa yīkāgnāg hā 'āpip. Yā 'Iyaet yōg tikmū'ūn hittap te yīktix Xīnāy kaka' pip, tu hāpxahīgnāg tu' pip, tu yīktix mō'kāmnāg pēnāhā', tu Topa yōg kuxap xexka pēnāhā', tu hāptup 'īhā hāpkoxtap pēnāhā', xix texgāy tu' yānām pēnāhā', tu kuxānōg xexka'. Pāyā 'āxop te nōm hāpxopmā ka'ok pēnā 'ohnāg nōmhā, yā 'ākuxānōg 'ohnāg. ¹⁹Ha nōm tikmū'ūn te mīxux xop tu kāyā'ax 'āpak, xix Topa yīy 'āpak, tu hām'āpak, tu kuxānōg xexka', hu' xak, puyīy tu yīy hok, ²⁰Topa yīy hā' tot 'ohnāg hah, ha' xat, hu: "Yīktix 'āpit hok, pe tikmū'ūn, pe xokxop, ka mīkaxxap hā tikmū'ūn 'ātux, tu 'āp-tex!" kaxīy. ²¹Tikmū'ūn te Topa yōg hāpxopmā ka'ok'ax pēnāhā', tu' kuxānōg xexka', yīy Mōyyex te: "Āte yāy puxu'ux, 'ūgkuxānōg tu!" kaxīy.

²²Pa 'āxop kuxānōg 'ohnāg, yā yīktix Xīām tu 'āmōxaha', Topa xe'ēgnāg yōg kōmēn tu 'āmōxaha', pexkox yōg kōmēn Yenoyanēn tu 'āmōxaha', tu pexkox yōg nū'pok xop xohix punethok pēnāhā', ²³xix Topak-tok xop te māxap pēnāhā', ha yāy tu nū'nāhā', tu' kuxa hittup xexka'. Yā Topa te nōm xop 'āxet'ax kax'āmi pexkox kopah, pu yāy mūtik tu pip ka'ok pexkox tu', xix 'āxop te Topa pēnāhā', ha' pa te hāmyūmmūg, tu' hep xop xohix yōg hāpxopmā'ax kopit putup, tu tikmū'ūn yōg mīy'ax xohix tu pago. Xix tikmū'ūn xakix xop pēnāhā', ha hāmyok mīy, yā' kuxa tup, Topa te' tupmāhā', pu tu kuxa max xe'ēgnāg. ²⁴Xix Yeyox pēnāhā', ha' pa'ax tup mīy, tu' xok yūmūg pupi', tu yāy hep 'āta nū'nāhā mīpkupnix tu', yā tik hittap Kayīy gāy, tu' taknōy 'Ameo putex, tu' yōg hep 'āta nū'nāhā', pāyā Yeyox hep 'āta nū'nāhā', pu hāpkummuk mīy'ax xaxogā'.

²⁵Ōg pa 'āti! Tikmū'ūn yīpkox 'ohnāg, puxix tu xakix, tu mōxa hok, nūy Topa mūtik tu pip ka'ok, yīy 'āpu yūmūg yīpkox pip Topa yōg hām'āktux pu', nūy yā yūmūg hi xe'e'. ²⁶Hōmā Topa yīy'ax te hām nuhuk,

pa hõnhã Topa te: “Hãpxip 'ihã 'äte xe hãm nuhuk putup, ha mõktu pexkox yã nuhuk kamah,” kaxiy. ²⁷Tu xe hãm nuhuk 'ãktux, ha ta hãm xexka yõg hãpxop nõãp-tup, pu pexkox yõg hãpxop tu pip ka'ok.

²⁸Yiy 'üyã yümüg kuxa te Topa max 'ãktux. Yã Topa mütik yümü'äte' xat putup, tu' xat kux 'ohnäg. Yümü'äte Topa max 'ãktux, tu nõm pu yümüg nüktettex, nüy yümüg kuxa' yëy, yã Topa tep-tup kaxiy. ²⁹Hamün. Yümü yõg Topa ka'ok, tu kuxap putuk. Yã kuxap te hãpxop xohix nõã', ha kaxiy Topa te tikmü'ün kummuk nõãp-tup, nüy 'ümïy'ax kummuk tu pago.

13 ¹'Axape xop putup pax, nüy tu nõm putup kux hok. 'Õhõm yã Kunnix yõg tikmü'ün, yiy 'ãxop hã 'ãxape'. ²'Axape puknõg xapit, putnü, nüy 'ãpet kopa xhip. Hõmã tikmü'ün hittap te' puknõg xop xãnhã', nüy yãy pet tu' pi', nüy nüy mõ'nïynãm, tu hãmyümmüg hok, 'ihã pexkox yõg nü'pok xop xãnhã', ha tikmü'ün pet kopa mõ'xip. ³Kanet kopa' pip xop xaxok hok, pãyã mõ'nïynãm, xa tep-tup kamah, pu 'ãnõy 'ahiy'ax xaxok hok. Xix 'ãxape xop xüy'ax xaxok hok, nüy tu mõ'nïynãm. Xatep-tup kamah pu 'ãnõy 'ãxüy xaxok hok, nüy mõ'ãnïynãm. ⁴Yã' max pu yãytax, nüy tu xetut mütik yãy kep müg nõm, xi' yïpxox mütik yãy kep müg nõm. Topa te' nõy hã' xupxet xop kopit putup, xi' xonnix xop kopit putup, nüy nõ hãpkummugã'.

⁵'Ok tayümak putup te 'ãp-tex? 'Üxupkumiy hok, xix 'ãnõy yõg hãpxop putup hok, xayiy 'õg hãpxop tu 'ãhittup, yã' puxi'. Topa te xa hãm'ãktux xex, hu: 'Äte yã 'ãnïm 'ohnäg, nüy 'ãmütik 'ãti,'" kaxiy. ⁶Yiy yümüg kuxãnõg 'ohnäg, nüy tu hãm'ãktux, hu:

“Topa te mögnïynãm, yiy 'ügkuxãnõg 'ohnäg.

Yã tikmü'ün 'üm tek kuxa kummugã hok,” kaxiy.

⁷'Apënë max'ax xop xaxok hok, Topa yõg hãm'ãktux xa' xuktux hah, ha' kuxa mãm ka'ok Yeyox kopah 'ihã' xakix, yiy xax, xa 'ãkuxa yüm ka'ok kamah, nüy yã 'ãnõy yõg hãpxopmã'ax tat. ⁸Yeyox Kunnix xip ka'ok. Yã hõmã hãmyãxatamuk xohix hã' xip ka'ok, xix hõnhã' xip ka'ok, xix hãptup xohix 'ihã' xip ka'ok putup mõ'kuma' mög. Yamün yïnmün, tu yãyhã' nõy 'ohnäg, tu yãy yãnãn 'ohnäg. ⁹Tikmü'ün te hãmyümmüg kummuk hã xa hãmyümmügãp-tup, ha ta 'ãyïpkox hok, pu 'ãmõgã kummuk hok. Yã Topa te yümüg kuxa ka'ogãhã', 'ütu max, pu yümüg'ã hãmaxnãhã'. Ha' puknõg xop te 'ãxat, tu' xat hok, xa' xit hok, yiy 'ãka'ogã 'ohnäg.

¹⁰Mõyyex te Yoneo yõg 'ãmãnex xop xat hok, pu xogyïn mõ'hap 'ax mã hok, tikmü'ün te Topa pu nõm xogyïn mõ'hap, nüy haxyã', ¹¹ha' yõg 'ãmãnex xat'ax te xokxop hep 'ãta tat Topa xip'ax xe'ëgnäg tu', pu Topa yã tikmü'ün yõg hãpkummuk mïy'ax xaxogã', pu tu kux. Ha xokxop yïn tat, Yoneo yõg tikmü'ün te' pip'ax künãpa' tat, nüy mõy mõ'hap, ha' nõg. ¹²Yiy Yeyox xok kãmën xexka künãpa kamah, nüy yãy hep 'ãta nunnãy, pu Topa tikmü'ün kuxa kummuk tupmã', pu tu kuxa max. ¹³'Äpu yümü mög Yeyox hah, nüy Yeyox pe mög, nüy yümüg xüy kamah. Hõmã Yeyox xüy, 'ükummuk xop te nõm pu' hupmãhã', ha' xüy, ha kaxiy yümüg xüy kamah, ha' kummuk xop te yümü'ã'

hũpmãhã!. ¹⁴Hãm xexka yõg kõmẽn xohix nõãp-tup, lãpu yũmũ'ãte pexkox yõg kõmẽn xax, yã nõm kõmẽn xip ka'ok, yĩy yũmũ'ãte' xak, nũy pexkox ha yũmũg mõg. ¹⁵Hu yũmũ'ãte yã mũn popmãhã Topa pu', nũy nõm max tãmnãg 'ãktux, tu Topa pu hãm'ãktux, puyi' xupax, hu: 'Ãmax xe'ẽgnãg, Topah! Kaxĩy. ¹⁶Hãpxopmã max, tu' xaxok hok, nũy 'ãnõy hã 'ãtehet. Yã Topa tep-tup.

¹⁷'Ãpẽnã max xop pu 'ãyĩpkox pi', nũy nõ xat'ax mĩy. Nõm xop hãm Topa pu', tu 'ãpẽnãnã' pip, tu Topa pupi 'ãpẽnã max, xa 'ãxop mõ kuma mõg Topa yõg putat hã. 'Ãyĩpkox pi', puxix 'ãpẽnã max, nũy yã hãpxopmã'ax tu kux. 'Ãyĩpkox pip hok, puxix yã pu hãpkummugã', ha 'ãpẽnã'ax xop yã hãpxopmã'ax tu' kuxa hittup 'ohnãg.

¹⁸Topa pu hãm'ãktux pax, nũy ta tu tu' kax, puk mũg ka'ogã'. Hak mũg kuxa te yãy yĩkopit, tu yãy yõg hãpxopmã'ax 'ãktux. Yãk mũ 'ãte' xak nũy hãpxopmã max pax. ¹⁹Tu xa tu' xak nãm, xa 'ãxop Topa tu xax, puyĩy mõgkutnã ka'ok 'ãhah.

Topa pu hãm'ãktux

²⁰Topa te yũmũg xuxyã Yeyox putpu hĩnnãhã', ha Topa yõg tikmũ'ũn pẽnãnã' xip. Yã' pẽnã max'ax xexka'. Kaxĩy tik te yãy yõg kahnẽn xop pẽnã max, yĩy Topa te' pa'ax tup mĩy, ha Yeyox xok, tu' hep 'ãta nũ'nãhã', pu Topa pa'ax mĩy. Ha' pa'ax kuxyã 'ohnãg. ²¹Pũyã Topa 'ãkuxa mãmãmã', xix xa hãmmaxnã', xa 'ãyĩpkox pi'. Pũyã Topa 'ãka'ogã', xayĩy hãpxopmã max, nũy Topa yõg putup'ax mĩy. Pũyã Topa yũmũg kuxa tupmã, 'ũ kuxa tu max, tuk putup tu'. Pũyã tikmũ'ũn xohix Kunnix max xe'ẽgnãg 'ãktux, nũy tu' xuktux mõ'kuma' mõg.

Tute hãm'ãktux kux

²²'Ūkxape xop, 'ãte xa tu' xak, xa 'ãpax, nũy tuk 'ãhã' tot. 'Ãte xa kax'ãmi', nũy 'ãk'ogã', xa 'ãkuxa tuknõg hok. 'Ap tox'ah nũhũ tappet. ²³'Ãte xa hãm'ãpak'ax max 'ũm 'ãktux, xayĩy hãm yũmmũg. Yã yũmũg xape Timõn te kanet tu' xip tap, ha' xut pu mõg. 'ũg ha' nũn, kopxix mõ'kutnã 'ãxop hah, puyĩy 'ãpẽnã.

²⁴'Ãpẽnã max'ax xop xohix pu 'ãneo, xix Topa yõg tikmũ'ũn xohix pu 'ãneo. Hãpxexka 'Itat yõg yũmũg xape xop te 'ãneo kamah.

²⁵Puyã Topa' xohix ha hãmmaxnã'. Tu ta tu' kux.